

開放文學－歷代筆記－宋高僧傳 第十卷

習禪篇第三之三（正傳□六人附見八人）唐洪州開元寺道一傳（智藏） 釋道一。姓馬氏。漢州人也華以喻性不植於高原。浪以辯識發明於溟海。生而凝重虎視牛行。舌過鼻准足文大字。根塵雖同於法體。相表特異於幻形。既云在凡之境。亦應隨機之教。年方稚穉厭視塵躅脫落愛取。游步恬曠。削髮於資州唐和尚。受具於渝州圓律師示威儀之旨曉開制之端。洗衣鍛金觀門都錯。大龍香象羈絆則難。權變無方機緣有待。聞衡岳有讓禪師即曹溪六祖之前後也。於是出岷峨玉壘之深阻。詣靈桂貞筮之幽寂。一見讓公。泯然無際頓門不俟於三請。作者是齊於七人。以為法離文字猶傳靈露。聖無方所亦寄清源。遂於臨川棲南康龔公二山。所游無滯隨攝而化。先是此峰岫間魍魅叢居。人莫敢近。犯之者炎燄立生。當一宴息於是。有神衣紫玄冠致禮言。捨此地為清淨梵場。語終不見。自爾猛鷲毒螫變心馴擾。查貪背僧即事廉讓。郡守河東裴公奉正信躬勤咨稟。降英明簡貴之重窮智術慧解之能。每至海霞斂空山月凝照。心與境寂道隨悟深。自明者在乎周物。博施者期乎濟眾。居無何。裴公移典廬江壽春二牧。於其進修惟勤率化不墜。大歷中聖恩溥洽。隸名於開元精舍。其時連率路公盼風景慕。以鍾陵之壤巨鎮奧區。政有易柱之弦。人同湊轂。禪宗戾止降祥則多順而無違。居僅□祀。日臨扶桑高山先照。雲起膚寸大雨均霑。建中中有詔僧如所隸將歸舊壤。元戎鮑公密留不遣。至戊辰歲舉措如常。而請沐浴訖。儼然加趺歸寂。享年八□。僧臘五□。先於建昌鄱山石名門。環以絕巘呀為洞壑。平坦在中幽偏自久。是謀薪火塵劫之會。非議岡阜地靈之吉。亞相觀察使隴西李公。藩寄嚴厲素所欽承。於以率徒。依歸緬懷助理。爰用營福道在觀化情存飾終。輟諸侯之旌旗。資釋子之幢蓋。其時日變明晦人萃遐邇。楫覆水而為陸。炬通宵而成晝。山門子來財施如積。邑裡僧供飯香普熏。自昔華嚴歸真於嵩陽善導座塔於秦嶺。禮祝齋斬人傾國城。哀送之盛今則三之。初於林中經行座下開示。平等垂法不標於四科。安恬告盡刻期於二月。此明一終之先兆也。示疾云逝俾葬遠山。凡百攀援願留近郭。終遂窮僻式遵理命。此又明一晦跡之素誠也。將歸靈龕。爰溯淺瀨。人力未濟舟行為遲。膏雨驟下於遠空。窮溪湍變於深涉。此又明一通神之應感也。惟一知真在空無我於有。是二俱離。假一為乘示生死者人能作佛。辨邪正者魔亦似聖。現身不留於大士。負手俄萎於哲人。弟子智藏鎬英崇泰等奉其喪紀。憲宗追諡曰大寂禪師。丹陽公包佶為碑紀述。權德輿為塔銘。今海昏縣影堂存焉。又唐虔州西堂釋智藏。姓廖氏。虔化人也。生有奇表。親黨異其偉器。八歲從師。道趣高邈隨大寂移居龔公山後。謁徑山國一禪師。與其談論周旋。人皆改觀。屬元戎路嗣恭請大寂居府。藏乃回郡。得大寂付授納袈裟。時亞相李公兼國相齊公映中郎裴公通皆傾心順教。元和九年四月八日終。春秋八□。夏臘五□五。即遷於塔。諫議大夫韋綬。追問藏言行編入圖經。太守李渤請旌表。至長慶元年諡大覺禪師云

唐宣州靈湯泉蘭若志滿傳

釋志滿。姓康氏。洛陽人也。幼少之年屬其家命沙門陳佛會。滿意樂不捨。遂投穎川龍興寺出家。聞洛下神會禪師法席繁盛。得了心要。南遊到黃山靈湯泉所。結茅茨。而止。後彩黃連鄉人見滿喜躍。滿問。此何處耶。鄉人曰。黃連山屬宣城也。願師鎮此。奈何虎豹多害。滿曰。虎亦有佛性。乃焚香祝厭之。由茲再息遂成大禪院。後示寂。春秋九□一。永貞元年入塔焉

唐沂州寶真院光瑤傳（道堅）

釋光瑤。姓周氏。北京人也。幼鍾茶蓼都不勝情。誓志出家。舍講肆入禪林。凡向宗師悉從求益。末遭會禪師。金〔金昇〕扶暝明視□方。後到沂水蒙山結草成庵。怡然宴坐。餽費之人翕然從化。時慎邑大夫知重首創禪宮。次兗州節使王僚尚書躬請入州行化。奏著額號寶真。學侶憧憧多沾大利。元和二年示滅。享年九□二云。又唐襄州慈恩寺釋道堅。姓王氏。丹陽人也。初發心於牛頭山慧忠禪祖。大曆元年棲隱池州南泉山。後詣襄漢泊慈恩寺。元和初載相國燕公鎮於漢南。深相欽重。問道周勤。施供繁沓。遂於鳳林關造寺請居。二年示滅。春秋七□三云

唐揚州華林寺靈坦傳

釋靈坦。姓武氏。太原文水人也。則天太后姪孫。父諱宣。洛陽縣令。母夏侯氏。初妊坦也夢神僧授與寶鑿表裡瑩然。且曰。吾以此寄汝善保護之。及誕親無所苦。年甫七歲誦習畢通應童子舉。□三從宦旋升太子通事舍人。如是悅學不休。三教之書彌增洞達。然而恒嗟朽宅暫入空門。已備大乘之資糧。終到涅槃之境域。於時洛都盛化荷澤寺神會禪師也。方遮普寂之光漸沒秀師之道。坦往參焉。會施善誘頓見其心。默而許之。容其執侍。父母不能回其意飛揚其係始末研磨得破疑滯。天寶初載召坦曰。吾有一句是祖祖相傳至曹溪。曹溪付吾。汝諦受之。吾當有留難。遂辭遊方焉。未幾果移會於弋陽。坦遂向廬州浮槎寺覽大藏經。後聞忠國師自南陽詔入。於大歷五年禮覲之。八年欲出關。忠奏曰。此人是貧道同門。俱神會弟子敕賜號曰大悲。兼齎墨敕。行化至梁園。時相國田公神功供養遷逝。適維揚六合方歎大法凌夷。忽聞空中聲云。開心地即見菩薩如文殊像曰。與汝印驗。令舉項以掌按之。觀有四指赤痕。其印跡恒現。又止潤州江中金山。今澤心也。其山北面有一龍穴。常吐毒氣如云。有近者多病或斃。坦居之毒雲滅跡。又於江陰定山結庵。俄聞有贊歎之聲。視之則白龜二。坦為受歸戒。又見二大白蛇身長數丈。亦為受戒懺悔。如是卻往吳興林山造一蘭若。有三丈夫衣金紫。趨步徐正稱歎。道場唯善。村落之民多棄罟網。元和五年相國李公鄜之理廣陵也。以峻法操下剛決少恩。一見坦鄭重加禮。召居華林寺。寺內有大將軍張遼墓。寺僧多為鬼物惑亂。坦居愀然無朕矣。又揚州人多患山妖木怪之所受惑。坦皆遏御焉。人爭歸信。至□年忽見二胡人。稱自龜茲國來彼無至教。遠請和尚敷演。□一年五月□三日。於荷澤忌齋告眾。吾赴遠請。七月示疾。九月將滅。斯預告也。至季秋八日果寂爾而終。遷塔於揚州西馴翟坊之南岡。越州掾鄭詹建塔。報齡一百八歲。僧臘八□四焉。坦即曹溪之孫。荷澤之子也

唐唐州紫玉山道通傳

釋道通。姓何氏。廬江人。其為童也持重寡辭。見佛形像必對禮歎詠不捨。因父宦於泉州南安。便求舍坼披緇誦經。合格敕度之。當天寶初載也。時道一禪師肇化建陽佛跡巖聚徒。通往焉。一師於臨川南康龔公山。亦影隨而去。然誓遊方吳越之間。台明山谷靡不登陟。迨乎回錫江西泐潭山門。勵心僧務不憚勤苦。貞元二年往南嶽見石頭禪師。猶彩縷加朱藍之色也。四年大寂禪師垂欲歸化。昌言曰。夫玉石潤山秀利益汝道業。遇可居之。通聞此言。且同隱識。殊不詳練。其年秋與伏牛山自在禪師同游京洛。回至唐州西。有山峰孤林密四絕人煙實有塵外之趣。乃問鄉人。云此山是紫玉山。通方憶大寂之懸記。我合居是峰也。乃陟崔嵬見山脊有石方正其色紫玉瑩然。歎曰號紫玉者合其稱也。先師之言非虛記也。掛錫解囊。參學之徒霧集。始則誅茅構舍。刺史李道古作意為建禪宮焉。元和八年弟子金藏出參禮百丈山海禪師。回見通。通愀然作色。汝其來矣。此山有主也。曳杖徑去襄州。道俗皆迎至七月□五日無疾而終。春秋八□三。一云故相國於嶼最所歸心尚書李翱禮重焉

唐雍京章敬寺懷暉傳

釋懷暉。姓謝氏。泉州人也。宿植根深出塵志遠。迨乎進具乃尚雲遊。貞元初禮洪州大寂禪師。頓明心要時彭城劉濟頗德暉互相推證。後潛岨岷山。次寓齊州靈巖寺。又移卜百家巖。泉石幽奇。苦於禪子請問繁雜。上中條山行禪法。為法者躡跡而往。蒲津人皆化之。元和三年憲宗詔入於章敬寺毗盧遮那院安置。則大歷中敕應天下名僧大德三學通瞻者。並叢萃其中。屬誕辰多於此修齋度僧焉。暉既居上院為人說禪要。朝寮名士日來參問。復詔入麟德殿賜齋推居上座。元和□年乙未冬示疾。□二月□一日滅度。春秋六□二。越明年二月。門人智朗志操等。奉全身葬於灞橋北原。敕諡大宣教禪師。立碑於寺門。岳陽司倉賈島為文述德焉

唐京兆興善寺惟寬傳（寶修）

釋惟寬。姓祝氏。衢州信安人也。祖曰安。考曰皎。生□三歲。見殺生者盡然不忍食。退而出家求翦發於僧曇。受屍羅於僧崇。學毗尼於僧如。證大乘法於止觀。成最上乘於大寂道一。貞元六年始行化於閩越間。歲餘而回心改服者百數。七年伏猛虎於會

稽。作滕家道場。八年與山神受歸戒於鄱陽。作回向道場。□三年感非人於少林寺。二□一年作有為功德於衛國寺。明年施無為功德於天宮寺。元和四年憲宗章武皇帝。詔於安國寺。五年問道於麟德殿。其年復靈泉於不空三藏池。□二年二月晦。大說於傳法堂。訖奄然而化。報齡六□三。僧夏三□九。歸葬於灞陵西原。詔諡曰大徹禪師。塔號元和正真。初寬說心要法三□年。度黑白眾殆及百千萬。應病授藥安可既乎。白樂天為宮贊時。遇寬四詣法堂。每來垂一問。寬答如流。白君以師事之。門弟子殆千餘。得法者三□九。入室受遺寄者曰義崇圓照焉唐羅浮山釋寶修。俗姓周。資州人也。從師於純德寺志求玄理。於蘄州忍大師法奮決了重疑。後愛羅浮山石室安止。檀越為造梵宇蔚成大寺。一日告門人曰。因緣相逼。愀然不樂眾咸莫測。順宗皇帝。深重佛宗。知修之名。詔入京與三藏擊問。並答翻譯之意。朗暢如流。乃留居輦下三年。終於京寺云

唐天台山佛窟巖遺則傳

釋遺則。俗氏長孫。京兆長安人也。祖冽鄂州司馬。考利涉隱居金陵。則弱不雜俗。恬恬終日而無所營。始從張懷瓘學草書。獨盡筆妙。雅耽經史尤樂佛書。以為得吾心。一朝捐家業從牛頭山慧忠。忠所謂牛頭六祖也。始天竺達磨以釋氏心要至。傳其道者有曹溪能高山秀。學能者謂之南宗學。學秀者謂之北宗學。而信祖又以其道傳慧融。融得之居牛頭山。弟子以傳授。由是達磨心法有牛頭學。則既傳忠之道。精觀久之。以為天地無物也。我無物也。雖無物未嘗無物也。此則聖人如影百姓如夢孰為死生哉。至人以是能獨照。能為萬物主。吾知之矣。遂南遊天台至佛窟巖蓋蒨荔薦落葉而屍居。飲山流飯木實而充虛。虎豹以為賓。麋鹿以為徒。兀然如枯。其後劇木者見之轉相告。有慕其道者曰。道者未有弟子。相率為築室。圖佛安僧。蔚為精舍焉。故元和已來傳則道者。又自以為佛窟學。佛窟之號自則始也。一坐四□年。大官名侯齋書問訊檀舍。則未嘗有報謝。禮拜者未嘗而作起。時歲在庚戌。季夏□有三日。召弟子曰。汝其勉之。至□五日夜遂坐歿。是夜山下人聞若山崩。旦望之則彩雲翔泊於巖上。父老皆泣曰。師死矣。已而視之果然。凡則二□歲為僧臘。五□有八而終。善屬文。始授道於鍾山。序集融祖師文三卷。為寶志釋題二□四章。南遊傳大士遺風序。又無生等義。凡所著述辭理粲然。其他歌詩數□篇皆行於世。則元居瀑布泉西佛窟本院建龕塔。會昌中例毀之。其院為道門所有。後開元寺僧正法光。於咸通乙酉歲。遂徙碑於今所。河南尹韓又偽碑文

唐婺州五泄山靈默傳(志閒)

釋靈默。俗姓宣。毗陵人也。本成立之歲悅學忘疲。約以射策。登第以榮親裡。承豫章馬大師聚眾敷演造禪關。馬師振容而示相。默密契玄機。便求披剃。若熟癰之待刺耳。受具之後苦練行門確乎不拔。貞元初入天台山中。有隋智者蘭若一□二所。懸記之曰。此地巖妙非雜器所棲。若能居此與吾無異。默因住白砂道場經於二載。猛虎來馴近林產子意有所依。又住東道場。地僻人稀。山神一夜震雷暴雨懸崖委墜。投明大樹倒斃側樹枝交絡。茅苔略無少損。遐邇聞旃皆來觀歎。後游東白山。俄然中毒。而不求醫。閉關宴坐。未幾毒化流汗而滴乃復常矣。行次浦陽盛化。有陽靈戍將李望。請默居五泄焉。元和初九陽田峻惶惶。默沿澗見青蛇夭矯瞪目如視行人不動。咄之曰。百姓溪竭苗死。汝胡不施兩救民邪。至夜果大雨合境云足。民荷其賜屬平昌孟簡中丞廉問浙東廢管內蘭若。學徒散逸。時暨陽令李胄狀舉靈山許重造院。□三年三月二□三日。澡沐焚香端坐繩牀。囑累時眾溘然而絕。壽齡七□二。法臘四□一。高僧志閒道行峭拔文辭婉麗。亦江左之英達。為默行錄焉

唐荊州天皇寺道悟傳(崇信)

釋道悟。姓張氏。婺州東陽人也。受天粹氣為王子。生而神俊長而謹願。年□四金翅始毛麒麟方角。啟白尊老將求出家。慈愛之旨不見聽許。輒損薄常膳日唯一食。雖體腹羸餒彌年益堅。父母不獲已而許之。遂往明州大德剎落。年二□五依杭州竹林寺大德具戒。以勇猛力扶牢強心。於六度門修諸梵行。常以為療膏肓者資上妙藥。開暗冥者求善知識。不假舟楫其濟渡乎。遂歷然振策投徑山國一禪師。悟禮足始畢密受宗要。於語言處識衣中珠。身心豁然真妄皆遣。斷諸疑滯無畏自在。直見佛性中無縈磷。服勤五載隨亦印可。俾其法雨潤諸叢林。悟蓄力向晦架入深阻。實冀一飛摩霄。乃轉遁於餘姚大梅山。是時大歷□一年也。層崖絕壑天籟蕭瑟竟無鄰落。七日不食。至誠則通物感乃靈。獠獍穀獲更饋橡栗。異日野夫操斧言伐其楚。偶所遭睹。駭動悚息馳諭朋曹。謂為神奇。曾不旬朔詣者成市。憑故倚峭且構危棟。費糧供具環繞方丈。猛虎耽耽侶出族游。一來座側斂折肢體。其類馴擾可知也。夫語法者無階漸。涉功者有淺深。木踰鑽而見火。鑿勤磨而照膽。理必然矣。是以掃塵累遁巖藪。服形體遺晝夜。精嚴不息趣無上道。其有旨哉。如是者三四年矣。將翔雲表慮羽毛之類織。欲歸寶所疑道塗之乖錯。故重有咨訪會其真宗。建中初詣鍾陵馬大師。二年秋謁石頭上士。於戲自徑山抵衡岳。凡三遇哲匠矣。至此即造父習御郢人運斤。兩虛其心相與聯合。白月映太陽齊照。洪河注大海一味。仲尼謂顏子亞聖。然燈與釋迦授記。根果成熟名稱普聞。如須彌山特立大海。繇是近佛恢張勝因。凡諸國土緣會則答。始卜於灑陽。次居於灑口。終棲於當陽柴紫山。即五百羅漢翱翔地也。裡鬆筠鬱以含風。崖巘嶮巖而造天。駕激灑之紫霞。枕清冷之玉泉。鸞鳳不集於蓬藿。至人必宅於勢勝。誠如是也。洪鍾待叩蒙蒙求我。川流星聚。虛往實歸。或接武於林樾。或駢肩於廬舍。戶外之屢爛其室盈矣。荊州雄藩也。都人士女動億萬計。莫不擊跪稽首向風作焉。崇業上首以狀於連帥而邀之。不違願力聿來赴請。屨及於虛落。錫及於都城。白黑為之步驟。幡幢為之轆轤。生難遭想得未曾有。彼優波鞠多者。夫何足云。有天皇寺者。據郡之左。標異他剎。號為名藍。困於人火蕩為煨燼。僧坊主靈鑿族而謀之。以為滿人攸居必能福我。夫荷擔大事蔑棄小瑕。乃中宵默往肩輿而至二寺夕有所失朝有所得。評論鋒起達於尊官。重於返復畢安其處。江陵尹右僕射裴公縉紳清重。擁旄統眾。風望眇昧當時准程。驅車盛禮問法動至。悟神氣灑落安詳自處。徐以軟語為之獻酬。必中精微洞過尚繁。又常秉貞操不修逢迎。一無卑貴坐而揖對。裴公訝其峻拔徵其善趣。謂抗俗之志當徑挺如是邪。悟以為是法平等不見主客。豈效世諦與人居而局狹邪。裴公理冥意會投誠歸命既見仁者我心則降。如熱得濯躁憤冰散。自是禪宗之盛無如此者。元和丁亥歲有背痛疾。命弟子先期告終。以夏四月晦奄然入滅。春秋六□。僧臘三□五。以其年八月五日。葬之郡東隅。靈龕建塔從僧禮也。悟身長七尺。神韻孤杰手文魚躍頂骨犀起行在於瓊瑤志在於華嚴。度人說法雄健猛利。其一旨云。垢淨共住水波同體。觸境迷著浩然忘歸三世平等本來清淨。一念不起即見佛心。其悟吟超頓為若此也先是煙燄之末殿宇不立。顧繇且虧瞻禮密。念結構罔知權輿。禪宴之際若值神物。自道祠舍濱江水焉。凡我疆畛富於鬆梓。悉願傾倒施僧伽藍。命工覘之宛若符契。於是斬巨棟乾修楹。撐崖拄壑雲屯井構。時維秋杪水洶都涸。徒眾斂手塊然無謀。會一夕兩至萬株並進。晨發江汜暮抵寺門。剗剗之際動無乏者。其餘廊廡牀案。靡非幽贊。事舉語怪闕而不書其感攝靈只皆此類也。比丘慧真文責等禪子幽閒。皆入室得悟之者。或繼坐道場。或分枝化導。時太常協律符載著文頌德焉。世號天皇門風也。又唐澧州龍潭禪院釋崇信。未詳氏族。信在俗為渚宮胡餅師之子。弱齡宛異神府寬然。昔天皇寺悟禪師。隱耀藏光人莫我測。信家居寺巷。恒曰提餅餠饋悟公齋食。食畢且留一餅曰。吾惠汝以蔭子孫。信一日自念曰。餅是我持去。何以返遺我邪。莫別有旨乎。遂拱手問焉。悟公曰。是汝持來復汝何咎。信聞似有驚怪。因勸出家便求攝受。曰爾昔崇福善今信吾言。故名之也。由是躬於井臼供億服勤。乃問悟云。未蒙指示心要。悟公云。時時相示。信餐稟斯言如游子之還家。若貧人之得寶。直從荊渚乃詣灑陽龍潭棲止。因李翱尚書激揚。時乃出世。後德山鑿師出其門。宗風大盛矣

唐鄴都圓寂傳(掘多)

釋圓寂。不知何許人也。恒以禪觀為務勤修匪懈。就嵩山老安禪師請決心疑。一皆明煥寂化行相部依附者多。久居天平等山。稠禪師往跡無不遍尋。時大司空嚴綬傾心信重。享壽一百五□五歲。咸亨二年己巳歲生按咸亨二年辛未。合云總章二年己巳也。世號無生和尚是歟。寂之高岸恒不欲人致禮邀請。必有不可犯之色。時或非之。然則志意修則驕富貴。道義重則輕王公。非其做誕勢使然也。釋掘多者。印度人也。從踰沙磧向慕神州。不問狄鞮旋。通華語而尚禪定。徑謁曹溪能師。機教相接猶弱喪還家焉。多游五台路由定襄。歷村見一禪者結庵獨坐。問之曰。子在此奚為。曰吾觀靜。多曰。觀者何人。靜者何物。得非勞子之形役子之慮乎。其僧茫昧拱默而已。作禮數四請垂啟發。多曰子出誰門邪。曰神秀大師。多曰。我西域異道。寔繁有徒。最下劣者不墮此見。兀然空坐蓍爛身疲。初無深益。子莫起如是見立如是論。早往韶陽請決所疑。能曰。子何不自觀自靜邪。不觀相不觀如子遊

歷日用自然安樂也。一如多所言。略無少異。伊僧扶開羅網。多後莫知攸往

唐袁州陽岐山甄叔傳

釋甄叔不知何許人也。幼而聰敏。偶儻不羈。心目融明。具大人相。觀生死輪上。見九地群迷。猶如蟪蛄處在蚊睫。受勝妙欲。似嚼蠟無味。遂投簪削頂。具佛幟。求正覺。義。扣大寂禪師。一造玄機。萬慮都寂。乃曰。群靈本源。假名為佛。體竭形消。而不滅。金流樸散。而常存。性海無風。驚波自湧。心虛絕兆。萬象齊照。體斯理者。不言而遍歷沙界。不用而功益玄化。如何背覺。反合塵勞。於陰界中。妄自囚繫。於是形同水月。流浪人天。叔見宜春陽岐山群峰四合。歎曰。坤元作鎮。造我法城。才發一言。千巖響答。鬆開月殿。星布雲廊。青嵐域中。化出金界。始從宴坐。四餘年。滿室金光。晝夜常照。於是化緣已畢。機感難留。元和庚子歲正月三日。忽棄塵區。還歸大定。門弟子如坦良寶等。心沒悲海。哀聲動山。如月隱天。群星失耀。大集眾木。積為香樓。用作茶毗。獲舍利七百粒。於東峰下。建窣堵波。上足任運者。命志閒。為碑紀述矣

唐新吳百丈山懷海傳

釋懷海。閩人也。少離朽宅。長游頓門。稟自天然。不由激勸。聞大寂始化南康。操心依附。虛往實歸。果成宗匠。後檀信請居新吳界。有山峻極。可千尺許。號百丈歟。海既居之。禪客無遠不至。堂室隘矣。且曰。吾行大乘法。豈宜以諸部阿笈摩教。為隨行邪。或曰。瑜伽論。瓔珞經。是大乘戒律。胡不依隨乎。海曰。吾於大小乘中。博約折中。設規務歸於善焉。乃創意不循律制。別立禪居。初自達磨傳法。至六祖已來。得道眼者。號長老。同西域道高臘長者。呼須菩提也。然多居律寺中。唯別院異耳。又令不論高下。盡入僧堂。堂中設長連牀。施椀架掛搭道具。臥必斜枕牀唇。謂之帶刀睡。為其坐禪既久。略偃亞而已。朝參夕聚。飲食隨宜。示節儉也。行普請法。示上下均力也。長老居方丈。同維摩之一室也。不立佛殿。唯樹法堂。表法超言象也。其諸制度。與毗尼師一倍相翻。天下禪宗。如風偃草。禪門獨行。由海之始也。以元和九年甲午歲正月七日歸寂。享年九十五矣。穆宗長慶元年。敕諡大智禪師。塔曰大寶勝輪焉

繫曰。自漢傳法。居處不分禪律。是以通禪達法者。皆居一寺中。院有別耳。至乎百丈立制。出意用方便。亦頭陀之流也。矯枉從端。乃簡易之業也。所言自我作古。古故也。故事也。如立事克成。則云自此始也。不成則云無自立辟。今海公作古。天下隨之者。益多而損少之故也。諡海公為大智。不其然乎。語曰。利不百。不變格。將知變斯格。厥利多矣。彌沙塞律有諸。雖非佛制。諸方為清淨者。不得不行也

唐潭州翠微院恒月傳（真亮）

釋恒月。姓韓氏。上黨人也。厥父為土監商。西江往還。俄遇剽略。溺死。月雖幼弱。念父葬於魚腹。母又再行。乃決志出家。求報恩育。受教於聖善寺慧初。得度。已造嵩山禪會。便啟發心要。後訪道尋師。靡憚夷險。抵望湖山翠微。嚴下古院。掛錫。四方學者。如蜂得王。翕然盛化。建中元年。示疾而終。春秋七十九。其年三月二日遷塔焉。洛京廣愛寺釋真亮。姓侯氏。景城人也。家訓儒雅。辭彩粲然。潔素持操。與群少年有異。忽以樊籠為厭。且曰。去情除饑。是所願也。遂於本州開元寺智休師下。披染服。然其刈薪汲水。率先於人。習行頭陀行。受具。已游嵩少。遇普寂。獎訓頓開。矇昧。入龍門山。居而禪默。問津者。交集聲望日隆。屬留守尚書王公鐸保釐。聞而欽奉。召入廣愛寺。別住居焉。示人禪觀。匪倦教詔。得道者亦多矣。以貞元四年一月三日。忽告門人。以桑榆末照。誠難久留。囑累而終。年八十八焉

唐襄州夾石山思公傳（曇真）

釋思公。姓李氏。恒陽人也。早出家於本府龍興寺。得度。後游伊洛間。見普寂禪師。開暢禪法。寂始見提誘。尋徹鉤深。至南雍隱夾石山。翛然自處。屬牛公觀政。漢南聞其聲績。請入城。謝病不應其命。牛帥亦不奪其志。檀施相望。學眾僉僉。若梅檀之圍繞焉。以興元初年。示疾歸滅。春秋八十四焉。亳州安國院釋曇真。姓陳。維青人也。少小隨父往彭城。鬻於逆旅。而亡所怙。真歎恨無依。乃投徐大雲寺為僧。其土是嵩法師之後。經論藪澤。真玩習該通。後游勝境。入嵩山學禪。觀已至任城。邂逅李中丞諷。赴職譙郡。接真談道。抵掌盱衡。如披雲霧。李恨相識之晚。請以同行。時聚風亭月。觀談道。達旦。李後人為京尹。因從容稱奏。真道成德至。德皇下詔徵。而不奉詔。貞元七年四月示滅。門人建塔云

唐定州大像山定真院石藏傳

釋石藏。姓呂。漢東人也。年鄰小學。露成人之度。跪告堂親。願為佛子。遂志入開元寺。削染受戒。克願禮嵩山寂禪師。豁悟禪法。至中山大像峰。間石室。孤坐冥寂。數夏安然。同好者望風而至。蔚成叢眾。陶化博陵人咸欣戴。會州帥李公卓。翹仰之切。命入城住。貴親玄論。謝云。野性難拘。不聞禮法。恐玷威陵。卓躬登山訪問。款密交談。深開昏昧。遂奏院題額曰定真焉。藏預白眾訣別。明日坐亡。春秋八十三。貞元六年正月入塔。立碑頌德云